



Sabtu, 31 Agustus 2024
Ogen : 1 Petrus 4:1-6



Kerincuhen Daging



Kai pe adi enggo lebihsa lanai mehuli upamana; mbuesa ngerana, mbuesa man, mbuesa minem si lit alkoholna, mbuesa tunduh, mbuesa erdahin, mbuesa tambar ras sidebanna. Kai pe arus nge lit keseimbangenna.

Wari enda si peringeti wari 'over dosis se doni,' si mereken kesadaren man banta maka enterem kalak si sakit erkiteken mbuesa man tambar, entah mbuesa minuman keras. Lit pe kalak si mate erkiteken si e. Arah renungen enda tole si bereken pergegeh man temanta si sakit entah si kebenen anggota keluargana erkiteken overdosis, janah man banta pe tetap ipersingeti gelah pentar make obat-obat si iperlukan daging kula, ula min sempat turah ka pinakit si deban.

I bas suratna man perpulungen ipersingeti Petrus uga kin orat nggeluh kalak si erkiniteken man Tuhan Jesus e. Nai, ope lenga nandai Jesus perpulungen e melala ngikutken sura-sura dagingna saja. Lit ka si ngikuti kebiasaan kalak sekelewet si la kin nandai Jesus. Nggeluh alu la meteh mela, ngikutken kerincuhen daging, mabuk-mabuk, pesta minem-minem si nggesuh, nagih minen inemen si banci mabuk, janah nembah man barhala-berhala, e me si erbahan manusia mbau. Tapi genduari kenca perpulungen e ngikutken Kristus, arusna lit perubahren, enggo tehna apai si man tadingenken, apai ka si man uraken gelah lit keseimbangan guna kesehaten daging kula ras kiniteken. Amin pe tokohi kalak erkiteken lanai ngikuti kerincuhen daging, lanai tama ngaruh. Tetap perpulungen e empertahanken kinitekenna, icidahkenna perbahanen si mehuli ras jagana kesehaten kulana. Bage min kerina kita njagai kulanta, gelah kerina kita sehat.